

Naqqiut

Siunnersuut 06. oktobari 2025-meersoq taarserpaa

**Makku naqqiutigineqarput: naqqitat naatsumik nassuiaatigineqarnerat.
Siunnersuutip qulequtaani iml. tunngavilersuutaani kiisalu Inatsisissatut
siunnersuummi § sorliit)**

**Inatsisartut Suleriaasianni § 33 naapertorlugu aalajangiiffigisassatut siunnersuut
imaattoq matumuuna saqqummiunneqarpoq:**

**Paasissutissanik qarasaasiatigut suliarinnittarfinnik angisuunik Kalaallit Nunaannut
inissiinissaq nunani tamalaani ingerlatseqatigiiffinnut pilerinartunngortinniarlugu
naalakkersuinikkut suliniutinik sunik aallartitsisoqarsinnaanera pillugu
Naalakkersuisut nassuiaasioqqullugit peqquneqarnissaannik Inatsisartut
aalajangiiffigisassaattut siunnersuut. Nassuiaat 1. januar 2027-utinnagu
Inatsisartunut agguanneqassaaq.**

(Inatsisartunut ilaasortaq Jørgen Rosbach, Demokraatit)

Tunngavilersuut

Annikitsumik iluarsiiisuteqarneq

**Paasissutissanik qarasaasiatigut suliarinnittarfinnik angisuunik Kalaallit Nunaannut
inissiinissaq nunani tamalaani ingerlatseqatigiiffinnut pilerinartunngortinniarlugu
naalakkersuinikkut suliniutinik sunik aallartitsisoqarsinnaanera pillugu
Naalakkersuisut nassuiaasioqqullugit peqquneqarnissaannik Inatsisartut
aalajangiiffigisassaattut siunnersuut. Nassuiaat 1. januar 2027-utinnagu
Inatsisartunut agguanneqassaaq.**

(Inatsisartunut ilaasortaq Jørgen Rosbach, Demokraatit)

Akissuteqaat

(Inuussutissarsiornermut, Aatsitassanut, Nukissiutinit, Inatsisit Atuutsinneqarnerannut
Naligiissitaanermullu Naalakkersuisoq)

Siullermeerneqarnera

Naalakkersuisut sinnerlugit Inatsisartut aalajangiiffigisassaattut siunnersuuteqartoq
qutsavigaara.

Paasissutissanik qarasaasiatigut suliarinnittarfik illorsuuvoq computerinut systemit paasissutissanik taakkualu atortuinik toqqorsiviit illusimaffigisassaat. Paasissutissanik qarasaasiatigut suliarinnittarfiit innaallagissamik pisariaqartitsinerat annertoorujussuuvoq, systemit atortuisalu ingerlaannarnissaannut innaallagialu annertoq pisariaqartinneqarmat, aamma paasissutissanik qarasaasiatigut suliarinnittarfiit kiattorujussuannngortitsisarmata, nillorsertarnissaannut nillorsiviit innaallagissamoortut pisariaqartinneqartussaammata.

Kalaallit Nunaat sananeqaatimigut nillertumik silaannaligaammat piujuartussanillu nukissiuuteqarfeqareermat Naalakkersuisut siunnersuuteqartoq isumaqatigaat nunarput paasissutissanik qarasaasiatigut suliarinnittarfinnik angisuunik pilersitsiffissatut pilerinartunngortinneqarsinnaasoq, inuiaqatigiit aningaasaqarniarnerannut iluaqutaasussamik.

Tassunga tunngatillugu erngup nukinganik Tasersiarmi Tarsartuullu Tasersuani nukissiorfiliarisinnaasat suliariumannittussarsiuunneqarnerinut atatillugu eqqaaneqareernikuupput paasissutissanik qarasaasiatigut suliarinnittarfiit, aningaasaleerusussinnaasunit pisiarineqarsinnaasutut, nukissiorfinniillu innaallagissamik pilersorneqarsinnaasutut. Taamaattumik nukissiorfinngorsinnaasunik suliariumannittussarsiuussinermut atatillugu periarfissat unamminartullu nunatsinni paasissutissanik qarasaasiatigut suliarinnittarfiit angisuut sananeqarsinnaanerinut atatillugu naliliisoqareernikuuvoq.

Sumiiffimmi allami paasissutissanik qarasaasiatigut suliarinnittarfinnik pilersitsinissamik eqqartuineq alla Nuup eqqaani Utoqqarmiut Kangerluarsunnguanni nukissiornermit sinneqartoorutinik atorluaasinnaanermut tunngatillugu pinikuuvoq. Suliami tassani Nukissiorfiit ataqatigiissaarisuupput innaallagissamik sinneqartoorutinik tuniniaanissamut tunngatillugu tassungalu tunngasunik attuumassuteqartunik oqaloqateqarnerit ingerlanneqarlutik.

Suliami ingerlanneqareersumi Kalaallit Nunaanni paasissutissanik qarasaasiakkut suliarinnittarfinnik pilersitsinissamut periarfissanut tunngasumi Naalakkersuisuni paasivagut unamminartorsiutaasinnaasutut maluginiagassaartoq taakkulu qanorpiaq isumaqarnersut paasiniaaffigaagut. Unamminartunngorsinnaasutut taaneqarsinnaasutut assersuutaasinnaavoq kabelini imaatigoortuni paasiuminassutsimut sakkortusaavinnik amigaateqarneq. Taakkua saniatigut ilisimavarput akornutissanik peqarsinnaanera inatsisiliornermi amigaatinut ajornartorsiutaasinnaasunulluunniit tunngasunik, akileraartarnermut tunngasuni siunertamut tulluannngitsunik peqarnera kiisalu ilinniartitaanermi neqeroorutinik attuumassutilinnik pisariaqartitsineq allanilluunniit. Nunat allat ingerlatseqatigiiffiisa Kalaallit Nunaanni paasissutissat qarasaasiatigut suliarineqartarfinnik pilersitsinissamik soqutiginninnerannut tunngatillugu aporfinngorsinnaasut unamminarsinnaasullu qanoq iliuuseqarfigineqarneri pillugit paasissutissatigut ataavartumik malinnaatinneqarpugut.

Taamaattumik Naalakkersuisunit inassutigissavarput nukissagut suliat maanna ingerlanneqartut naammassinissaannut atussagigut, nassuiaasiornissamut atornagit. Ilisimavarput paasissutissanik qarasaasiatigut suliarinnittarfiit issittumi piujuaanartumik annertuumik nukissiortoqarnissaa pilerigaat. Ilisimavarput aningaasaliisartunut tunniussinnaasagut suunersut. Aamma Tasersiarmi Tarsartuullu Tasersuani erngup

nukinganik nukiorfiliornissamik suliat ingerlapput taamalu Utoqqarmiut Kangerluarsunnguanni innaallagissamik sinneqartoorutaasumik tuniniaasinnaanermut tunngasut ingerlallutik.

Tamanna tunuliaqutaralugu imaattumik allannguutissatut siunnersuuteqartoqassaaq:

” Taseriarmi Tarsartuullu Tasersuani erngup nukinganik nukissiorfiliornissamut periarfissanik misissuisitsinermi suliariumannittussarsiuussilluni annertuumik suliaqareernermi misilittagarilersimasani Naalakkersuisut nassuiaammik suliaqaqqullugit peqquneqassasut. Nassuiaammi periarfissat unamminartullu selskabit nunanit allaneersut paasissutissanik qarasaasiatigut suliarinnittarfinnut pilersitsinissaannut pilerisunnerulernissaannut tunngasuussapput. Nassuiaat Inatsisartunut agguanneqarsimassaaq 1. januar 2027 nallertinnagu.”